

Uvodne napomene supervizora za Brčko na redovnoj konferenciji za štampu održanoj 21. Kolovoza 2002. u prostorijama OHR Brčko

Kao što znate, tenzije su porasle oko pitanja tržnice Arizona pošto je Vlada Brčko Distrikta pristupila implementaciji ugovora o preuređenju zatvaranjem radnji koje nemaju dozvolu za rad. Situacija je barem postala jasnija: neki vlasnici zemljišta i možda neki kriminalni subjekti organizirali su prošlog tjedna nezakonitu blokadu ceste Orašje – Tuzla, zastrašivali legitimne trgovce na malo, i spriječili vladine djelatnike da neometano obavljaju svoje dužnosti. Policija i službenici Vlade su pokušali da smire situaciju. Ali ukoliko se nastavi sa primjenom ove nezakonite taktike, vjerujem da će policija poduzeti neophodne mjere hapšenja i istrage u cilju sprovođenja zakona. Koliko znam nelegalni parkinzi su jutros zatvoreni.

U ovom sukobu se ne radi isključivo o imovinskim pravima. Tu se ne radi o jednoj ili drugoj nacionalnoj skupini. Ovdje vidimo nastojanja da se putem organiziranog kriminala nastavi kontrolirati tržnica Arizona, bez poštivanja vladavine prava, kako se godinama radilo. Dok su mi neki od vlasnika zemljišta rekli da oni pozdravljaju rekonstrukciju i modernizaciju tržnice, postupci drugih jasno pokazuju da oni imaju suprotan stav. Sviđalo im se to ili ne, ugovor sa Italprojektom i Regulacioni plan za tržnicu Arizona su odobreni u jednom otvorenom, demokratskom postupku, i primjenjivaće se sukladno zakonu. Oni koji rade na tržnici, uključujući vlasnike radnji na privatnom zemljištu, moraju zaključiti ugovore sa

Italprojektom ukoliko žele da nastave sa radom.

Svaka vlada ima pravo da izvrši eksproprijaciju imovine u javnom interesu. Brčko Distrikt će, kao i druge demokratske vlade, izvršiti kompenzaciju legitimnim vlasnicima sukladno zakonu. U slučaju tržnice Arizona, jasno je da je eksproprijacija neophodna, kao što je Skupština Brčkog i odlučila u srpnju. Sada je ovo još očiglednije, nakon što su protivnici rekonstrukcije tržnice Arizona počeli blokirati ceste i onemogućavati vladinim inspektorima pristup.

Kao što je svima poznato, nedostatak infrastrukture na tržnici Arizona predstavlja prijetnju javnoj sigurnosti i zdravlju. Godinama su vlasnici zemljišta poduzimali vrlo malo ili ništa da je poboljšaju. Neće im se dozvoliti da blokiraju postojeću infrastrukturu niti da spriječe Italprojekt u izgradnji potpuno nove infrastrukture. Jasno je da je eksproprijacija neophodna da bi se ovo i postiglo.

Bio sam razočaran kad sam uvidio da su neke političke stranke nerazborito pokušale prikazati nastojanja Brčkog da poboljša tržnicu kao atak na hrvatske nacionalne interese. Ovakva argumentacija je apsurdna. Svatko može učestvovati u zakonskim poslovnim aktivnostima na novoj tržnici Arizona. Ugovor Italprojekta čak daje prednost onim trgovcima koji već rade na tržnici Arizona. Ono što isključujemo je kontrola putem organiziranog kriminala, bez obzira o kojim se etničkim skupinama radi. Ne mogu da zamislim zašto bi jedna politička stranka željela da bude dovedena u vezu sa organiziranim kriminalom.

Ljudima u Bosni i Hercegovini je dosta kriminala i korupcije – svako ispitivanje javnog mnijenja na tu temu to i pokazuje. Ljudi žele gospodarski razvoj sukladno sa vladavinom prava. To je upravo ono što odlučno želimo obezbijediti na tržnici Arizona.

Tržnica Arizona je jedna od najvećih u regiji. Ona posjeduje

potencijal da postane još veća. Moramo je preurediti sada da bismo iskoristili ovu stvarnu gospodarsku priliku.